

# Prosjektplan for Hardanger vassområde 2022-2027

## Organisering, ansvar og oppgåvefordeling



Samarbeid for bedre vassmiljø

## Føreord

Denne prosjektplanen fortel om organisering, ansvar og oppgåvefordeling for drift av Hardanger vassområde for perioden 2022-2027.

Planen er godkjent av vassområdeutvalet i møte 24.3.2022

Det er ei målsetjing å forankre denne prosjektplanen politisk gjennom vedtak/informasjon i kommunane i Hardanger vassområde.

Leiar Hardanger vassområdeutval  
Ordførar i Ulvik kommune Hans Petter Thorbjørnsen

# Innhold

<b>1. INNLEIING.....</b>	<b>4</b>
1.1. HEIMELSGRUNNLAG OG PLANARBEIDET .....	4
1.2. PRIORITERINGAR I VASSFORVALTNINGSPLANEN TIL VESTLAND .....	5
1.3 OM HARDANGER VASSOMRÅDE (SJÅ KART SISTE SIDE).....	5
<b>2. ANSVARET TIL SEKTORSTYRESMAKTENE .....</b>	<b>6</b>
2.1. KOMMUNANE .....	7
2.2. FYLKESKOMMUNEN .....	8
2.3. STATSFORVALTAREN .....	8
<b>3. ORGANISERING AV VASSOMRÅDET.....</b>	<b>8</b>
3.1. ORGANISERING .....	9
3.2. VASSOMRÅDEUTVALET .....	9
3.3. VASSOMRÅDEKOORDINATOR (VOK) .....	10
3.4. ADMINISTRATIV GRUPPE FOR KOMMUNAR SOM ER MED I SPLEISELAGET: .....	11
3.5. FAGGRUPPER .....	11
3.6. REFERANSEGRUPPE .....	12
<b>4. FINANSIERING OG ØKONOMI .....</b>	<b>12</b>

# 1. Innleiing

## 1.1. Heimelsgrunnlag og planarbeidet

Vassdirektivet vart gjort gjeldande i norsk lovverk gjennom forskrift om rammer for vassforvaltning (vassforskrifta) som trådde i kraft 1. januar 2007 (St.prp. 75 (2007-2008)). Vassforskrifta er heimla i vassressurslova (§§ 9, 65), forureiningslova (§9), plan- og bygningslova (pbl) (§§ 3-6, 8-1, 9-7) og naturmangfaldlova (§26a).

Klima- og miljødepartementet har koordineringsansvaret for vassforskrifta på nasjonalt nivå. Arbeidet vert samordna med andre departement som har mynde for vatn etter eige sektorlovverk.

### Koordineringsansvar:

<b>Nasjonalt:</b>	Klima- og miljødepartementet
<b>Direktoratsnivå:</b>	Miljødirektoratet
<b>Regionalt:</b>	Vestland fylkeskommune

Eit viktig føremål med vassforskrifta er å sikre ei meir heilskapleg og økosystembasert vassforvaltning i Norge ved utarbeiding av regionale vassforvaltingsplanar og tiltaksprogram etter krav i vassdirektivet. Vassforvaltinga skal virke på tvers av sektorar og administrative grenser, vere systematisk og målretta, kunnskapsbasert og tilrettelagt for brei medverknad.

Vassforskrifta (vf) § 23 gjev vassregionstyresmakta (utpeikte fylkeskommunar) i samarbeid med vassregionutvalet løyve til å dele vassregionen opp i fornuftige vassområde. Vestland vassregion er på dette grunnlag delt inn i ni vassområde. Kommunane er inviterte i eit spleiselag med Vestland fylkeskommune for å finansiere drifta av vassområdet og løn til ein vassområdekoordinator.

Det går fram av vassforskrifta § 29 siste ledd at:

*«Godkjente forvaltningsplaner skal legges til grunn for regionale organers virksomhet og for kommunal og statlig planlegging og virksomhet i vannregionen, jamfør plan- og bygningsloven §8-2».*

Planforslag som er i strid med godkjent regional vassforvaltingsplan er grunn for vurdering av om motsegn skal fremjast. Det gjeld dei miljømåla som planen set, og krava i vassforskrifta § 12 for å tillate ny aktivitet eller nye inngrep.

## 1.2. Prioriteringar i vassforvaltningsplanen til Vestland

I høyringsutgåva til vassforvaltningsplanen for Vestland 2022-2027 er følgjande prioriteringar nemnt i tilfeldig rekkefølge (kan verta endra etter endeleg vedteken plan i 2022):

1. Restaurering av vassdrag, klimatilpassing og flaumsikring  
2021-2030 er peika ut som FN sitt internasjonale tiår for restaurering av øydelagd natur
2. Arealbruk  
Betre rutinar for bruk av § 12 i vassforskrifta (vurdera ny aktivitet og nye inngrep)
3. Vasskraft  
Innføre standard naturforvaltningsvilkår i alle regulerte vassdrag  
Revisjon av konsesjonsvilkår
4. Avløp  
Følgje opp nasjonale føringar av mars 2019 særskilt når det gjeld spreidde avløp etter ureiningsforskrifta kapittel 12 og 13
5. Landbruk  
Følgje opp nasjonale føringar av mars 2019 når det gjeld tap av næringsstoff punktkjelder, fysiske inngrep og ureining frå landbruksplast
6. Beskytta område  
Beskytte drikkevatt med omsynssoner for å ha godt råvatn  
Auka tilsyn med offentlege badeplassar
7. Akvakultur  
Målet er å redusere påverknad frå lakselus og rømming av oppdrettsfisk på laks og sjøaure
8. Betre data- og kunnskapsgrunnlaget  
Meir kartlegging og oppdateringar i Vann-nett
9. Kunnskapsdeling  
Det er behov for betre opplæring og erfaringsutveksling innan vassforvaltning
10. Ressursar – økonomiske og administrative  
Sikre finansiering av vassområda

## 1.3 Om Hardanger vassområde (sjå kart siste side)

**Vassområdet areal: 4892 km<sup>2</sup> med 555 vassforekomstar**

Vasskategori	Tal	Storleik
Kyst	9	331 km <sup>2</sup>
Grunnvatn	13	26 km <sup>2</sup>
Innsjø	128	153 km <sup>2</sup>
Elv	405	10746 km <sup>2</sup>
Sum vassforekomstar	555	

**Vassområdet består av kommunane med folketal pr 2020:**

Kommune	folketal	% av kommunen i vassområdet
Ullensvang	11062	Ca 68 %
Kvam	8468	Ca 100 %
Ulvik	1076	Ca 70 %
Eidfjord	904	Ca 100 %
Voss herad (Granvin)	926	Ca 15 %
Kvinnherad		Under 10 %,berre høg fjell
Samnanger		Under 10 %,berre høg fjell
Sauda (Rogaland)		Under 5 %,berre høg fjell

**Fylgjande kommunar ligg innanfor vassområde Hardanger:**

• Granvin (som frå 2020 vart ein del av nye Voss herad) • Ulvik • Eidfjord • Ullensvang (som frå 2020 vart ein del av nye Ullensvang kommune) • Odda (som frå 2020 vart ein del av nye Ullensvang kommune) • Jondal (som frå 2020 vart ein del av nye Ullensvang kommune) • Kvam. I tillegg har Sauda, Kvinnherad, Samnanger marginale areal innanfor vassområdet.

Hardangerfjorden er 183 kilometer lang med mange små og store fjordarmar. Dette er Norges nest lengste fjord etter Sognefjorden, og den femte lengste fjorden i verda. Fjorden vert rekna rekna å gå frå Halsnøy og Huglo og i vest i Sunnhordland til Odda og Eidfjord i aust i Hardanger.

Det største djupet er på meir enn 850 meter like ved Norheimsund om lag halvveges inn i fjorden. Isbreen Folgefonna ligg på sødsida av Hardangerfjorden.

Stor tettleik av oppdrettsanlegg for laks gjer Hardangerfjorden til ein av fire store oppdrettsregioner i verda. Alle kommuner i Hardanger vassområde har kystlinje mot fjorden.

Vassområdet er prega av fjellandskap som stig bratt opp frå fjorden med mange store lange vassdrag med stor vassføring. Fleire av desse har viktige nasjonale laksestammer. Området er prega av store vasskraftutbyggingar frå 1970-åra med store inngrep med dammar og delvis tørrelagde elvar. Dei uregulerte vassdraga er store med god fortynning og dermed mindre påverknad frå landbruk og avløp. Mange av kommunane i området er prega av stor hyttebygging. I ein del av områda er jordbruk ei stor og viktig næring. Busetnaden er konsentrert rundt små og større tettstader. Fjordarmen Sørfjorden inn mot Odda har i mange årtider historisk attende i tid vore påverka av smelteverksindustri med utslepp av miljøgifter til fjordbotnen.

## 2. Ansvar til sektorstyresmaktene

Ansvar til sektorstyresmaktene er beskrive i vassforskrifta og i tilhøyrande rettleiingsmateriale. Statleg, kommunal- og fylkeskommunal sektor, skal vurdere påverknadar, miljømåloppnåing, samt foreslå og følge opp miljøtiltak innanfor eige ansvarsområde. Alle aktuelle sektorar har rett og plikt til å delta i planlegginga når den vedkjem deira ansvarsområde, jamfør (vf) § 22 og (pbl) § 8-3. Dette gjeld også prosessen med å utarbeide dei regionale vassforvaltningsplanane, med tilhøyrande tiltaksprogram (vf) §25.

Vedtak om gjennomføring av tiltak vert treft av ansvarleg styresmakt etter gjeldande sektorlovverk, og regional vassforvaltningsplan med tilhøyrande tiltaksprogram (miljømålet, forslag til tiltak) skal leggst til grunn for sektorstyresmaktas saksbehandling.

Saksbehandlninga til sektorane skal gi ytterlegere avklaring og vurdering av fordeler og ulemper før endeleg avgjerd om gjennomføring vert tatt, og dersom det blir aktuelt å fråvike føresetnaden i vassforvaltningsplanen skal dette rapporterast og grunngjevast i Vann-Nett. Alle tiltak skal vere operative innan tre år etter at tiltaksprogrammet er fastsett (vf § 25).

## **2.1. Kommunane**

Pliktene til kommunen er konkret beskrive på [Miljødirektoratet si heimeside](#). Kommunen er mynde på fleire område som påverkar vassmiljøet og vasskvaliteten, herunder avløp, landbruk, vassforsyning, miljø, forureining og arealplanlegging.

### **Oppgåver:**

#### **Samarbeide**

Kommunen skal samarbeide med andre kommunar om å løyse oppgåvene i vassforskrifta i vassområdet.

#### **Delta i planlegging**

Kommunen skal delta i planlegginga i vassregionen og vassområdet når planlegginga gjeld kommunen sitt verkeområde.

#### **Bidra til medverknad**

Kommunen skal bidra til at innbyggjarar og næringsliv, lokale organisasjonar og sektormynde kan delta i prosessen.

#### **Bidra til å identifisere påverknader og prioritere**

Kommunen skal bidra med å identifisere dei menneskeskapte påverknadane på vassførekomstane i kommunen, peike ut dei mest sårbare vassførekomstane, og kva for prioriteringar som skal gjennomførast i planperioden.

#### **Delta i arbeidet med tiltaksprogrammet**

Kommunen skal komme med forslag til tiltak der dei har mynde til å betre miljøtilstanden i vassførekomstane.

#### **Spele inn konkrete miljømål for vassførekomstane**

Kommunen skal føreslå miljømål for vassførekomstane i kommunen.

#### **Oppfølging**

Kommunen skal følge opp tiltak som inngår i tiltaksprogrammet og treffe vedtak etter relevant lovgiving der kommunen er mynde. Tiltaka skal setjast i gong innan tre år etter at tiltaksprogrammet er godkjent.

I sakshandsaming til kommunen skal ein vurdere kost/nytte ved det einskilte tiltaket før det vert konkludert om tiltaket skal gjennomførast.

Når regional vassforvaltningsplan er godkjend av regjeringa skal den leggjast til grunn for all verksemd og planlegging i vassregionen og kommunen.

### **Vurdere ny aktivitet og nye inngrep**

I saker der kommunen er styresmakt skal kommunen vurdere om ny aktivitet eller nye inngrep i ein vassførekomst fører til at miljømål ikkje vert nådd eller at tilstanden vert forringa, og eventuelt om vilkåra etter vf § 12 er oppfylt. Bruk av vf § 12 skal rapporterast til vassregionstyresmakten (Vestland fylkeskommune).

## **2.2. Fylkeskommunen**

Vestland fylkeskommune er styresmakt for Vestland vassregion. Vassregionstyresmakta har prosessansvar og fungerer som koordinerande ledd mellom nasjonale styresmakter og vassområda i vassregionen. Vassregionstyresmakta skal gje rammer og rettleiing for organisering og gjennomføring av arbeidet i vassområdet, og leggje til rette for at dette skjer på ein fagleg forsvarleg måte og innanfor nasjonale fristar.

Fylkeskommunen skal som sektorstyresmakt vurdere påverknadar, miljømåloppnåing, og foreslå og følge opp miljøtiltak innanfor eigne ansvarsområde.

Vestland fylkeskommune bidreg årleg med midlar i eit spleiselag med kommunane om drift av vassområdet. Det vesentlege av midlane frå fylkeskommunen er tilskot frå Miljødirektoratet.

## **2.3. Statsforvaltaren**

Statsforvaltaren er miljøfagleg ansvarleg og rådgjevar i vassregionen og har hovudansvaret for å utarbeide dei regionale overvakingsprogramma i samarbeid med andre sektorstyresmakter og vassregionstyresmakta.

Statsforvaltaren har ansvar for å oppdatere kunnskapsgrunnlaget og å registrere overvakingsdata i Vann-nett i samråd med aktuelle styresmakter.

Statsforvaltaren skal som sektorstyresmakt vurdere påverknadar, miljømåloppnåing, og foreslå og følge opp miljøtiltak innanfor eigne ansvarsområde.

Statsforvaltaren mottar årleg statlege midlar til overvaking, problemkartlegging og andre fagrelaterte prosjekt frå Miljødirektoratet. Vassområda har årleg fått økonomisk tilskot til blant anna overvaking.

## **3. Organisering av vassområdet**

Vassområdet skal fungere som ein samarbeidsarena for kommunar, statlege styresmaktar og fylkeskommunen, for å ivareta oppgåver etter vassforskrifta på lokalt nivå. Alle relevante styresmaktar kan delta i arbeidet.


Vassområdet skal og vere ein arena der kommunar som deltek i spleiselaget (jf. kap. 4) og vassområdekoordinator kan samarbeide tettare fagleg, og vassområdekoordinator hjelpe kommunane i arbeidet med å følgje opp oppgåvene etter vassforskrifta. Vassområdet er nærare skildra på [Vannportalen](#).



Ein kommune som ikkje deltek i spleiselaget er ikkje friteke for sine plikter og oppgåver etter vassforskrifta jamfør kap. 2, og må gjennomføre oppgåvene på lik line med andre sektorstyresmakter.

### 3.1. Organisering

Arbeidet i vassområdet er organisert som vist i figur 1. Vassområdeutvalet fungerer som styringsgruppe og legger rammene for arbeidet i administrativ gruppe og eventuelle faggrupper. Det er etablert ei lokal referansegruppe for vassområdet.



*Figur 1 – Skisse over organisering av vassområdet i ulike grupper.*

### 3.2. Vassområdeutvalet

Vassområdeutvalet (VOU) fungerer som styringsgruppe for vassområdet, med ein politisk vald (fortrinnsvis ordførar/varaordførar) og ein administrativ representant frå kvar kommune, i tillegg til ein administrativ representant frå fylkeskommunen og ein representant frå Statsforvaltaren. Andre statlege styresmakter blir kalla inn og deltar etter eige ønske.

Representantar frå kommunar som ikkje deltek i spleiselaget og statlege sektorstyresmakter har ikkje stemmerett i saker som gjeld årsmelding, rekneskap, aktivitetsplan, budsjett og bruk av midlane til vassområdet. VOU vel sjølv leiar med vara.

Dersom det ikkje er semje om vedtak i styringsgruppa, blir dette avgjort ved simpelt fleirtal. Berre dei politiske representantane frå betalande kommunar har stemmerett. Den som har stemmerett kan ved forfall gi fullmakt til ein politisk eller administrativ representant til å stemme på sine vegne. Dersom det er same tal stemmer for og imot, har leiar (eventuelt møteleiar ved leiars forfall) dobbeltstemme. VOU er vedtaksdyktig når minst halvparten av representantane med stemmerett inkludert leiar eller vara er til stades.

Vassområdekoordinator deltar som sekretær for VOU.

#### Oppnemning av representantar i VOU

Kommunen vel politisk representant med vara og utpeikar administrativ representant med stadfortredar. Politiske representantar vert valde for aktuell valperiode. Fylkeskommunen, Statsforvaltaren og andre sektorstyresmakter oppnemnar representantar etter eigne retningslinjer. Endringar av representantar skal meldast til vassregionstyresmakta (fylkeskommunen).

VOU vel leiar med vara for valperioden.

### **Vassområdeutvalet - ansvar og oppgåver:**

- Ansvar for den overordna framdrifta, fastsetje årlege rammer slik at arbeidet blir organisert på ein føremålstenleg måte og i tråd med føringar og tingingar frå sentrale styresmakter og vassregionstyresmakten, herunder:
  - Fastsetje prosjektplan
  - Handsame årsmelding og rekneskap
  - Vedta aktivitetsplan og budsjett
  - Spele inn framlegg til årleg overvakingsprogram
- Leiar for vassområdeutvalet representerer vassområdet i Vestland vassregionutval.
- Medlemene i vassområdeutvalet skal vidareformidle saker og oppgåver attende til eigen kommune/sector, og skal arbeide for at aktuelle saker blir følgt opp med eventuell politisk handsaming og forankring i eigen kommune.
- Medlemene skal arbeide for at kommunen legg til rette for medverknad i vassforvaltningsarbeidet, for eksempel frå interesseorganisasjonar, verksemdar, grunneigarar og andre innbyggjarar.
- Vassområdet kan i spesielle saker gje høyringssvar.
- Utarbeide grunnlagsdokument i samband med revideringa av regional plan for vassforvaltning.

### **3.3. Vassområdekoordinator (VOK)**

Vassområdekoordinator er kontaktperson og sekretær for vassområdet, og utførar det daglege arbeidet. Forutan å drifte vassområdet, jobbar vassområdekoordinator opp mot kommunane som deltek i spleiselaget, for å hjelpe desse i arbeidet med å følgje opp oppgåvene etter vassforskrifta (dei viktigaste punkta er lista opp under). Vassområdekoordinator er tilsett hjå Vestland fylkeskommune.

#### **Ansvar og oppgåver til VOK:**

- Vere koordinator for kommunane, og arbeide for at kommunane følgjer opp oppgåvene etter vassforskrifta.
- Arrangere møte i vassområdeutvalet, administrativ gruppe, referansegruppe og temagrupper etter behov.
- Utarbeide forslag til årsmelding, rekneskap, aktivitetsplan og budsjett, og leggje dette fram for administrativ gruppe og vassområdeutvalet.

- Sette i gang og følge opp overvaking, problemkartlegging og utgreiing av tilstand, påverknadar og naudsynte tiltak i vassførekomstane. Gjennomføre anskaffingar ved behov og søkje om tilskot til gjennomføring.
- Hente inn oversikt over tiltaksgjennomføring frå kommunane og rapportere i vann-nett.
- Vere fagleg ressursperson for kommunane, og kan hjelpe kommunane med å søkje midlar til vassdragstiltak.
- Samarbeide med relevante instansar inkludert andre vassområde og forskingsmiljø.
- Legge til rette for lokal medverknad og engasjement frå grunneigarar, organisasjonar, næringsliv og lokalbefolkning.
- Tilby orientering om arbeidet med vassforskrifta for politiske utval, kommunestyre og tilsette i kommunane.
- Vere vassområdet sin representant utad, bidra til informasjonsformidling om arbeidet.

### **3.4. Administrativ gruppe for kommunar som er med i spleiselaget:**

Hovudoppgåva er å samarbeida tettare fagleg med VOK. Gruppa er samansett av administrative representantar frå kommunane som deltek i spleiselaget i vassområdet. Ved behov kan fleire representantar frå same kommune delta på møte i gruppa, til dømes for å dekke ulike fagområde. I tillegg bør Statsforvaltaren i Vestland som fagansvarleg og fylkeskommunen som prosessansvarleg for vassforvaltingsarbeidet delta. Andre statlege sektorstyresmakter vert invitert ved behov. VOK fungerer som sekretær.

#### **Administrativ gruppe sitt ansvar og oppgåver:**

- Vere eit forum for fagleg diskusjon og erfaringsutveksling.
- Delta i utforminga av aktivitetsplan og budsjett før det vert lagt fram for vassområdeutvalet.
- Samarbeide med VOK i arbeidsoppgåver og førebu saker som skal fremjast for VOU.
- Samarbeide med VOK om overvaking, problemkartlegging og fremjing av tiltak.
- Arbeide for at vassforvaltningsarbeidet i kommunen er forankra i kommunen sitt planverk.

### **3.5. Faggrupper**

Ei faggruppe kan opprettast for spesifikke tema. Faggrupper er mellom anna relevante innan landbruk og avlöp. I kvar gruppe deltek representantar frå relevant fagetat i spleiselagskommunane. Det er ønskeleg at Statsforvaltaren deltek som fagansvarleg i

faggruppe for landbruk og avløp. Fylkeskommunen, statlege sektorstyresmakter og lag- og organisasjonar vert invitert ved behov. VOK er sekretær for gruppene.

### Ansvar og oppgåver:

- Vere eit forum for fagleg diskusjon og erfaringsutveksling.
- Bidra til at tiltaksprogrammet blir følgt opp innan eige fagområde i sin kommune/sektor, eventuelt gjennom samarbeid mellom kommunar.
- Bidra til rapportering av status for tiltak i egen kommune.

## 3.6. Referansegruppe

Det er etablert ei lokal referansegruppe for vassområdet. Referansegruppa skal vere talerøyr for ulike interesser, som til dømes friluftsliv, reiseliv, energiproduksjon, landbruk, fiske, naturvern med meir. Referansegruppa er open for alle som ønskjer å delta.

Referansegruppa blir orientert om arbeidet i vassområdet og får høve til å kome med tilbakemeldingar og innspel på arbeidet. Medlemene i referansegruppa kan bli invitert med på relevante temamøte og synfaringar, og bli haldt oppdaterte om det som skjer i vassområdet gjennom deltaking på t.d. e-postliste og nyhende på nettsida. Om det er tilstrekkeleg interesse for det, kan det også bli arrangert møte spesielt for referansegruppa.

## 4. Finansiering og økonomi

### Kostnader

Kostnadane vil i hovudsak knytte seg til vassområdekoordinator, møter, reiser, kurs overvaking, problemkartlegging, og utgreiing av tilstand og naudsynte tiltak i vassførekomstane. Vassområdekoordinator er tilsett hjå Vestland fylkeskommune.

Tabell 1. Samla utgifter for vassområdet per år i prosjektperioden.

Kostnader per vassområde per år i planperiode (2022 – 2027)	
Vassområdekoordinator (50%), inkl. sosiale utgifter	400.000,-
Møter, reiser og kurs	50.000,-
Overvaking, problemkartlegging og utgreiing av tilstand og tiltak	150.000,-
<b>Årleg sum</b>	<b>600.000,-</b>

### Finansiering


Drifta av vassområdet er eit spleiselag der kommunane finansierer 50 % av kostnadane, medan fylkeskommunen finansierer dei resterande 50 %. Fylkeskommunen får midlar frå Miljødirektoratet til spleiselag for drift av vassområda. I fordelingsnøkkelen er det forsøkt å ta omsyn til ulikskapen mellom kommunane samt vektlegge dei problemstillingane som gjer at vassområdekoordinatoren vil bruke tid i kommunen. Vedteken betalingsmodell for

Tabell 2. Fordelingsnøkkel for kommunale kostnader i vassområdet.

Grunnlag	Andel
Lik fordeling (grunnsats)	30 %
Folketal	35 %
Jordbruksareal i aktiv drift	35 %

			Statistikk		Kostnadsfordeling per vassområde			
Kostnadsfordeling kommunar i Vestland 2022 - 2027			Befolkning	Jordbruks-areal i drift (dekar)	Fast del	Etter folketal	Etter jordbruks-areal	SUM pr år 2022-2027
K-4618	Ullensvang	Hardanger	11 062	23 541	22 500	51 770	39 234	113 504
K-4618	Voss (Granvin)	Hardanger	926	8 501	0	4 334	14 168	18 502
K-4619	Eidfjord	Hardanger	904	2 460	22 500	4 231	4 100	30 831
K-4620	Ulvik	Hardanger	1 076	6 670	22 500	5 036	11 116	38 652
K-4622	Kvam	Hardanger	8 468	21 830	22 500	39 630	36 382	98 512
SUM Vassområde		Hardanger	22 436	63 002	90 000	105 000	105 000	300 000

Vassområdet betalar ikkje møtegodtgjering eller reiseutgifter til medlemmer i vassområdeutvalet eller andre som møter i administrativ gruppe, faggrupper eller referansegrupper.



*Figur Hardanger vassområde*